


Bersifat Draf

AWIG-AWIG DESA ADAT TUKAD BELAH



AWIG-AWIG



**DESA ADAT TUKAD BELAH, KECAMATAN RENDANG,
KABUPATEN KARANGASEM**

2020

**PIDAGING
MAKA BANTANG AWIG-AWIG
DESA ADAT TUKAD BELAH
MURDHA - CITTA**

SARGA I ARAN LAN WEWIDANGAN
SARGA II PETITIS LAN PEMIKUKUH
SARGA III SUKERTA TATA PAKRAMAN

Palet 1 Indik Krama
Palet 2 Indik Prajuru Desa
Palet 3 Indik Kulkul
Palet 4 Indik Paruman
Palet 5 Indik Druwen Desa
Palet 6 Sukerta Pamitegep
Kaping 1 Karang lan Tegal
Kaping 2 Pepayonan
Kaping 3 Wewangunan
Kaping 4 Wewalungan
Kaping 5 Baya

Kaping 6 Penyanggra Desa
SARGA IV SUKERTA TATA AGAMA

Palet 1 Indik Dewa Yadnya
Palet 2 Indik Resi Yadnya
Palet 3 Indik Pitra Yadnya
Palet 4 Indik Manusia Yadnya
Palet 5 Indik Bhuta Yadnya

SARGA V SUKERTA TATA PAWONGAN

Palet 1 Indik Pawiwahan
Palet 2 Indik Nyapian
Palet 3 Indik Sentana
Palet 4 Indik Warisan

SARGA VI WICARA LAN PAMINDANDA

Palet 1 Indik Wicara
Palet 2 Indik Pamidanda

SARGA VII NGUWAH NGUWEHIN AWIG-AWIG

SARGA VIII P A M U P U T

MURDHA CITTA
OM AWIGNAM ASTU NAMO SIDDEM

Manut Perda Provinsi Daerah Tingkat I Bali, Nomor 06 Tahun 1986 saha putusing paseban krama Desa Adat Tukad Belah gumawe awig-awig maka sepat siku-siku pematut, utawi pamereh wastu kasidan prayojanam name kabeh, presama angidep muah amageh aken, kadi linging awig-awig iki.

SARGA I
ARAN LAN WEWIDANGAN DESA

Pawos 1

- (1) Desa puniki mewasta Desa Adat Tukad Belah
- (2) Jabar kakuwub wawidangan nia, mewasta nyatur luire:
 - a. Sisi wetan/kangin : Tukad Cangkeng
 - b. Sisi Kulon/Kauh : Desa Besakih
 - c. Sisi Lor/Jaka : Desa Adat Temukus
 - d. Sisi Kidul/ : Desa Adat Trib
- (3) Desa puniki kewangun antuk asiki banjar Adat.

SARGA II
PATITIS LAN PAMIKUKUH

Pawos 2

Desa puniki ngemanggehang pamikukuh minakadi:

- (1) Pancasila Dasar Negara Republik Indonesia.
- (2) Undang-Undang Dasar 1945 pamekas pasal 18.
- (3) Tri Hita Karana manut sada cara Agama Hindu.
- (4) Peraturan Pemerintah Provinsi Bali No. 6 th. 1986.
- (5) Undang-Undang No.6 Tahun 2014
- (6) Peraturan Daerah Provinsi Bali Nomor 4 Tahun 2016

Pawos 3

Luir petitis/tetujun Desa Tukad Belah:

- (1) Mikukuhang miwah ngerajegang sanghyang atma.
- (2) Nginggilang / nincapang tata prawertining agama.
- (3) Ngerajegang kasukertan desa saha pawongan nia, sekala niskala.

SARGA III
SUKERTA TATA PAKRAMAN

Palet 1

Indik Krama

Pawos 4

- (1) Sane kebawos krama desa inggih punika kulewarga sane megame Hindu, sampun madue rabi, ngamong karang desa inggihan nenten saha nyungsurung karang desa.
- (2) Sejaba punika sinanggeh tamiu.

Pawos 5

Krama desa wantah krama kuwuban

Pawos 6

Ngawit dados krama desa

- a. Mawiwit pawihan.

- b. Sangkaning ngererh karya jenek ring Desa Tukad Belah, saha sampun ngaturang ilikita indik pakisahan.

Pawos 7

- a. Nyantos asasih sesampun upacara widi widana (mesakapan).
- b. Sangkaning ngererh karya 6 sasih sesampun naur penanjung batu.

Pawos 8

Sahanan krama desa sami keni tetegenan luire: peturunan, pepeson, ayahan.

Pawos 9

- (1) Krama desa kedadosang:
 - a. Mapoangkid mapiteges ten tedun ngayah minakadi: ri kala metepetin lan keleluasan.
 - b. Keni pinungkan/sakit.
 - c. Kejudi olih sang ngawerat/pemerintah.
- (2) Kedadosang nyada mekadi:
 - a. Sinalih tunggil okane lanang sampun merabian.
 - b. Sampun mayusa 70 warsa.
- (3) Ngampel meteges ipun nutug ayah antuk arta brana makeduaning magenah ring dura desa.

Pawos 10

- (1) Usan mekrama desa sangkaning :
 - a. Seda.
 - b. Pinunas ngeraga.
 - c. Kenorayang.
- (2) Sang usan mekrama desa sangkaning kanorayang (kesepekang):
 - a. Patut muputang utang piutang ring desa.
 - b. Tan polih pah-pahan ring desa.

Pawos 11

- (1) Desa Adat Tukad Belah keenter antuk Kelian Desa.
- (2) Kelian Desa Patut:
 - a. Mawiwit saking krama pengarep.
 - b. Kecatri/kepilih olih karma Desa Adat.
 - c. Tan nahenin keni pamidanda/hukuman saking guru wisesa.
 - d. Maduluran dewa saksi ring pura desa.
 - e. Uning ring pangilikita.

Pawos 12

- (1) Kelian Desa kesanggra antuk:
 - a. Petajuh winaka wakil.
 - b. Penyarikan pinaka juru surat.
 - c. Petengen pinaka pangemong druen desa (bendahara).
 - d. Kasinoman pinaka juru arah.
 - e. Prekangge/pamiteket
- (2) Prajuru lianan ring kelian desa ke adegang.
 - a. Kapilih kecatri nangken 5 warsa
 - b. Sida kapilih malih yening kari kasungkemin krama desa.

Pawos 13

- (1) Swadarman prajuru desa luire:
 - a. Ngenterang sedaging awig-awig miwah perarem.
 - b. Nuntun tur ngenterang krama desa, ngupati antuk patitis/tetujon.
 - c. Mawosin kalih niwakang pamutus marep ring wicara krama desa.
 - d. Maka duta desa matemuang bawos ring sapisira ugi.

- (2) Yan wenten prajuru desa iwang penglaksana keni pamidanda nikel ring keiwangan krama saha keangkat kerarianang.
Pawos 14
- (1) Petitis utawi olih-olihan prajuru desa luire:
- Luput pepeson.
 - Polih sarin aturan jinah/beras pah 3 (tiga) palihan utawi tunjangan ring guru Wisesa.
 - Patias seosan manut perarem.
 - Prekangge luput pepeson miwah ayahan.
- (3) Ngadegang prajuru ngangge upacara pewintenan ngelantur mejaya-jaya.

Palet 2
Indik Prajuru Desa
Pawos 15

Prajuru desa kagentosin riantuk:

- Seda
- Kenorayang duaning nilar sesana.
- Wit saking pekayun rahayu/pinunas ngeraga.
- Sesampun kelokika perarem.
- Megingsir genah utawi nilar desa.

Palet 3 Indik Kukul
Pawos 16

- (1) Kukul ring desa Adat Tukad Belah luire:
- Kukul desa.
 - Kukul sekeha-sekeha.
- (2) Tabuh tetepakan kukul desa:
- Atulud alon : tengeran ngayah.
 - Kalih tulud alon : pawiwahan.
 - Tigang tulud alon : Padem.
- (3) Tengeran pancabaya:
- A tulud bulus : jiwa baya.
 - Kalih tulud bulus : arta baya.
 - Tigang tulud bulus : toya baya.
 - Petang tulud bulus : geni baya.
 - Lima tulud bulus : kelindu baya.

Pawos 17

- Kukul desa tan wenang ketepak yening tan sangkaning pituduh prajuru desa, sejawaning tetenggeran kepanca baya.
- Sang nepak tan sangkaning pituduh patut di gelis atur upeksa indik penepake, yan tan asapunika sang mamurug ke danda manut perarem.
- Kukul sekeha – sekeha tan wenang matehin kukul desa, prade mamurug keni pemidanda manut perarem.
- Tatepakan kukul sekeha – sekeha patut matehin tatepakan kukul desa.

Palet 4
Indik Paruman
Pawos 18

- (1) Paruman ring Desa Adat Tukad Belah wenten:
- Paruman Prajuru:

1. Nangken 6 sasih nuju Buda Wage Menail lan manut kawigunan.
 2. Nangken rahina segalah-galah
- b. Paruman desa kawentenang:
Nyabran 6 sasih nuju rahina Buda Wage Kelau, napkala manut kawigunan maka cihna wenten arah.
- (2) Sangkepan desa kawentenang nyabran asasih ring rahina Buda Wage
 - (3) Pemargin paruman prajuru wiadin desa sekadi ring sor puniki:
 - a. Persida luimaksa risampun katedunin antuk sang patut ngemiletin aparo langkung mejalaran antuk tetengeran kulkul saha abusana adat manut dresta miwah tan kalugra mkata gegawan (ingihan mabawos sane tan manut).
 - b. Tan maren ngarcana bhegawan penyarikan maka sarana widi widana cana.
 - c. Makasarana janggi, pengawit kelaksanayang penyacak.
 - d. Tan kalugra ngawetuang suara gora utawi biuta, yan wenten asapunika keni pamidanda bia pecamil manut perarem.
 - e. Krama desa sane pacang ngawentenang bebawos mangda nyantos pangendikan saking pangenter acara.
 - f. Pemutus bebawos beriuik sepanggul punika kemnaggehang.
 - (4) Prada pidaging paruman tan kaingkupin jantos ping tiga, prajuru desa ring paruman selanturnya wenang nibakang pemutus.

Pawos 19

- (1) Sejeroning paruman desa, prajuru patut nyiarang pemargin ngenterang desa pemekas ngeninin indik:
 - a. Munjuk lungsuring pakraman, saha ayah-ayahan sulur arta brana druen desa.
 - b. Rencana prajuru ngeninin indik usaha desa kapungkur.
- (2) Pemutus paruman desa sinanggeh perarem maka pamitegep pemargin awig-awig.

Pawos 20

- (1) Sangkepan prajuru kepatutang wantah ngerincikang pangerencana usaha desa kapungkur.
- (2) Sangkepan prajuru tan kepatutang ngawedalang tetengenan ring krama sedereng kaingkupin antuk krama desa.
- (3) Pemutus paruman prajuru desa ngamedalang pasuara kaputusan (keputusan).
- (4) Sangkepan sekeha-sekeha patut atur upeksa ring prajuru desa, mangda prasida tan lempas saking patitis.

Palet 5 Indik Druwen Desa

Pawos 21

Druen desa sekadi ring sor:

- (1) Kahyangan desa luire: Pura Desa, Pura Dalem, Pura Puseh, Pura Prajapati.
- (2) Tanah tegalan merupa:
 - a. Telajakan Pura Desa \pm 8 are.

- b. Telajakan Dalem \pm 6 are
- c. Telajakan DPuseh \pm 8 are
- d. Telajakan Prajapati \pm 3 are
- e. Tanah Setra Linggahipun kirang langkung 50 (Seket) are
- (3) Tanah Genah Wantilan \pm 2 are,
- (4) Sarana lan Prasarana Sepeda Motor
- (5) Lelanguan luire: Bleganjur.
- (6) Piranti-piranti mekadi:
 - a. Pretima lanang istri ring Pura Desa miwah Pura Dalem, Pura Puseh.
 - b. Bjra asiki

Pawos 22

Pilih-pilih desa luire:

- a. Urunan saking krama.
- b. Pengampel saking krama
- c. Paica saking guru wisesa.
- d. Paica-paica sane tiosan sane patut.
- e. Punia/aturan saking sira ugi.
- f. Usaha saking patut.

Pawos 23

- (1) Prajuru desa wenang ngetanggung duwen desa.
- (2) Pikolih keanggen prabea piodalan saha wewangunan di pura.
- (3) Nyabran sangkepan desa, dulu pengemong drue ngawentenang preindik nunjuk lungsuring padrue ring krama desa.
- (4) Saluir druen desa patut wenten ilikitanya.
- (5) Tan kalugra ngadol utawi ngesahang padruen desa yan tan kasungkemin antuk krama.

Palet 6 **Sukertan pamitegep** **Kaping 1** **Karang Tegal**

Pawos 24

- (1) Krama desa patut ngewatesin karang parumahannya antuk pagehan utawi tembok penyengker.
- (2) Prade kerasayang pagehan/tembok inucap ngelikadin yan pade arsa penyandingnya kengin batase nganggen pinget kewannten keaksi antuk prajuru desa utawi precihna pal.
- (3) Mangda keutahayang ten wenten karang ke bebeng.

Pawos 25

- (1) Sinalih tunggil krama desa tan kelugra:
- (2) Prade wenten sekadi ring ajeng sang ngelahlah wenang ngewaliang tanah inucap saha keni pamidanda manut perarem, kadulurin upakara ring pangelahlah tanah suci.

Kaping 2
Pepayonan
Pawos 26

- (1) Ngawit nandur pepayonan tanem tuwuh patut adepa agung ngajeroang saking batas, prade jantos ngeliwat batas wenang ka sepat gantungin.
- (2) Yening wenten tetanduran ngungkulin semaliha ngewastu mayanin kepisaga patut ke wara antuk paiguman ping ajeng prasida sang neruwenang wit ngerebah utawi notor.
- (3) Prade sampun kewara taler ten wenten usaha, sang neruwenang sang rumasa ketetehan/ kajerihang wenang mesadok ring sang prajuru tur ri sampun ke paritatas prajuru patut mastikayang mangda notor tur patin pepayonan kedrue antuk desa.
- (4) Sangkening pamidanda penyangaskara saha prabea manut perarem, manut ring wewangunan sang karubuhin luire:
 - a. Sang neruwenang wit sinanggeh mayanin prade pungkut ngerubuhin wangunan tios.
 - b. Sang notor, nunggal utawi ngerebah taru tur ngerubahin wangunan tios.
- (5) Krama desa patut ngemanggehang kawerdian tanem tuwuh sane ngawinang desane asri tur lestari.

Kaping 3
wewangunanan
Pawos 27

- (1) Nyabran ngewangun patut:
 - a. Mesadok ring kelian desa/prajuru ring ajeng wewangunan ngeninin wates.
 - b. Ngangge asta gumi miwah geguluk asta kosala kosali sanistane manut ring patitis niskala.
- (2) Prade wewangunane jantos nyayubin napimalih tembok ring telenging wates risampun keware tur sampun kesadokang ring kelian wenang kedanda manut perarem, saha tembok inucap kegubar utawi senistane mangda ke karyanang abangan.

Kaping 4
wewalungan
Pawos 28

- (1) Sehanan krama sane miara wewalungan, patut sayaga nitenin negul wiadin ngelogor mangda tan ngarusuhin karang utawi pabianan karang krama sewos, napi malih nyantos ngranjing ngeletihin kayangan.
- (2) Prade wenten wewalungan malumbar utawi ngeleb ngerusuhin pekarangan/pabianan krama tios risampun keware kengin ketaban tur kedanda ngewaliang wit sane karusak, saha naur penebus pepiaraan tetaban anut pengelokika kelian desa, mesengker tigang raina, petang raina kadol.
- (3) Prade jantos ngeletihin tegal suci, risampun keparitatas antuk kelian desa wenang sang nruenang kedanda tur ngewentenang pamarisuda manut dresta.
- (4) Krama desa patut nyanggra wewalungan miwah sarwa prani tan kepatut:
 - a. Ngemademang paksi.
 - b. Nuba ulam miwah sane siosan.

Kaping 5
B h a y a
Pawos 29

Para indik baya luire:

- (1) Jiwa bhaya, arta bhaya (kepondung), lindu bhaya, geni bhaya, kaplegendang, dura cara ring agama.
- (2) Sang manggihin bhaya patut nepak kulkul bulus mapitulung.
- (3) Prade ring palemahan desa kehanan jiwa bhaya patut desane ngaturang pemrayastista manut dresta.

Pawos 30

- (1) Sang memangihin arta bhaya/kemalingan patut ngulkul bulus mapitulung.
- (2) Pratingkahing mepailon ring dusta kebawos saruron (kerjasama), prade wenten jadma nyaduang patut kedanda dadi dandaning maling sane kehnyane manut perarem, tur prade jantos ping tiga (3) ngelaksanayang asapunika wenang kasukserahang ring sang ngawiwenang.
- (3) Prade wenten jadma ngerereh minakadi daun kelapa, ron, tan mesadok ring sang neruwenang prade kacunduk / ketara patut kedanda kadi dandaning maling, keh nyane manut perarem.
- (4) Yening wenten jadma ngeranjingin pakubon / pekarangan rikala suung (nyalah masa) mewastu sang madrue karang kaicalan wenang jadma inucap ketuwekang antuk medewa saksi ring Pura Dalem mangda tan ketuwekang manut ring ajeng, asing-asing ngeranjingin pakubon tios patut:
 - a. Matengeran suara (makaukan)
 - b. Nyantos sang neruwenang karang rawuh nampek indik kabuatan.
 - c. Pamedal karangnya kedagingin sawen macihna pengarah rikala suung.

Kapin 6
Penyanggra Desa

Pawos 31

Prade wenten sinalih tunggil krama desa ngawentenang karya suka duka patut kesanggra olih desa, manut pinunas sang madue karya.

SARGA IV
SUKERTA TATA AGAMA

Palet 1

Indik Dewa Yadnya

Pawos 32

- (1) Pelinggih penyiwihan desa luire: Pura Desa, Pura Dalem, Pura Puseh, Pura Prajapati.
- (2) Raina odalan soang-soang kahyangan inicap sekadi ring sor:
 - a. Pura Desa : Rikala Purnama Kelima
 - b. Pura Dalem : Rikala Purnama Keenem, Buda Wage Klau, lan Sugihan Bali.
 - c. Pura Puseh : Rikala Purnama Kelima, Tumpek Krulut.
 - d. Pura Prajapati : Panglong Purnama Sasih Keenem
- (3) Pengaci ring sowang-sowang pura inucap manut ring kecap sastra agama saha kelaksanayang nista, madya, utama manut perarem. Pura pamucuk lan kawentenannya keenter antuk pemangku keanutin antuk krama desa.

Pawos 33

- (1) Ring soang-soang pura patut ngadegang pemangku.
- (2) Ngadegang pemangku manut dudonan:
 - a. Nyanjan utawi mesemurang ring ajeng penataran.
 - b. Kecatri utawi kepilih olih krama.
- (4) Tan kawenang anggen pemangku luire:
 - a. Cedangga.
 - b. Sane maderbe kesucian urip tan becik.
- (5) Prabea kepemangkuan:
 - a. Adiksa widi (ngawinterin) kemadalin saha kelaksanayang olih sane ngadegang (krama desa) manut kasidan rangkep rauhing busana.
 - b. Mapitra yadnya riwekas patut kasungkemin antuk krama desa, sanistane brahma prayascita (makinsan ring ibu pertiwi).

Pawos 34

Swadarma pemangku

- (1) Ngenterang upacara ring kahyangan desa utawi ring sowing-sowang pekubon krama manut panguleman.
- (2) Tan wenang salah sulub, yan mamurug wenang mangku inucap nyepuhin raga, saha prebea ipun kemedalin olih pemangku inucap.
- (3) Prade salah sinunggil mangku kapialang/cuntaka kengin nyelang mangku sewosan utawi nuur sang sulinggih.
- (4) Semaliha yan sampun pemangku ngayah tigang rahina ring pura (munggah ambu) kancit wenten keluargania kepadaman mangku inucap tan keni cuntaka sahe wentene mangku tan budal salami piodalan.

Pawos 35

Petias utawi olih-olihan pemangku luire:

- (1) Apah empat (4) saking galih miwah sarin canang sajeroning piodalan.
- (2) Pemargine ring soang-soang pakubon krama sesari sami katiba ring pemangku.
- (3) Patias sane linanan manut perarem.
- (4) Luput tetegenan.

Pawos 36

- (1) Pemangku kagentosin riantukan: seda, pinunas ngeraga, kenorayang antuk krama desa.
- (2) Prade mangku keusanang sangkaning nilar sesana keni pamidana manut perarem, saha ngewaliang prabea pawintenan pecak (ane malu).
- (3) Pemangku patut ngerihinang muput ring wewidangan desa sesampune wau kedura desa.

Pawos 37

Indik Kasukertan Kahyangan

- (1) Tan kelugra ngeranjing ring pura mekadi:
 - a. Sang ketiben catur cuntaka luire:
 - a) Sebel kandel ngeraja sewala.
 - b) Sebel medue putra.
 - c) Sebel pengantenan.
 - d) Sangkaning kepadaman/kelayu sekar

- b. Makta sahaning barang sinanggeh ngeleتهin.
 - c. Sato agung sajawining rikala mepepada.
 - d. Mabusana tan manut mekadi tata caraning ngeranjing ke pura.
 - e. Sedereng polih uwak-uwakan utawi petuduh saking prajuru.
- (2) Pretingkahe tan wenang ring pura:
- a. Mesumpah (cor) sejawaning pituduh prajuru/kelian desa.
 - b. Mekobetan, mesesenengan, mekolem dados asiki lanang wadon, mebacin/ngewarih, nyangsang busana.
 - c. Munggah tedun pelinggih wewangunan sejawaning petuduh prajuru, upami rikala mebersih utawi masang luhur.
- (3) Sang mamurug kecape ring ajeng keni pamidanda pamarascita sepatutnya manut drestha.

Pawos 38

- (1) Yan wenten jadma kerauhan ring pura kengin kepintonin antuk prajuru prade rumaksa kesumiang sayan, yan tan wiakti jadma inucap kasisipan manut perarem.
- (2) Prade kahyangan kehanan durmenggala minakadi ke panca baya pemangku patut nyadokang digelis ring kelian desa mangda marumang krama desa tur ngawentenang pangupakara pamrayascita.

**Palet 2
Indik Rsi Yadnya**

Pawos 39

- (1) Sang pacang madeg pandita utawi pinandita minakadi, balian, sonteng, kubayan, dalang, sekeluiring jagi ngenterang yadnya patut masadok ring prajuru/kelian desa kalih parisadha Hindu Dharma miwah ring sang ngawiwenang.
- (2) Prajuru desa patut ngawas nitenin tur wenang ngalangin prade wenten kecihnan nyasar ri kecap miwah dresta inggihan uger-uger ring parisada tur sareng nyaksinin, upakara/upacara saha nyiarang ring paruman desa tegep rauhing wates kawenangan muput yadnya, prade nepek manut sastra miwah dresta.

**Palet 3
Indik Pitra yadnya**

Pawos 40

- (1) Pemargin pitra yadnya dudonan manut ring sor:
 - a. Penguparang sang kelayu sekar:
 - Antuk mendem utawi ngeseng, makecihna mekingsan ring ibu pertiwi, ring bethara brahma, salami nuptupang prabea.
 - Upakara-upakara pitrayadnya riusan keabenang mewasta munggah daun bingin (ngeroras) wau kelaksanayang pengingkup ring pelinggihan sane sampun kecawisang.
- (2) Swadarmaning lan tetegenan ri pade sinalih tunggil krama kelayu sekar.
 - a. Sang kaduhkitan patut:
 - Nyadokang ring kelian desa tur nunas tetimbangan ring kawentenannya, tur nguningang indik upakarane.
 - b. Swadarmaning kelian desa/prajuru patut:
 - Maritatas pemargine sang kaduhkitan mekadi indik pemargin upakara.

- (3) Tan kalugra:
 - a. Nanem rikala: hari-hari suci, gotongan, piodalan, semut sedulur.
 - b. Nginepang bangbang.
 - c. Sesampun munggah ambu rauhing melayagin.
- (4) Prade sang kelayu sekar sangkaning gering ngelahlah patut pendem sedinaning pati, kemargiang sandi kala.

Pawos 41

- (1) Sang sinanggeh kecuntaka sekadi ring sor:
 - a. Cuntaka antuk kelayu sekar (kematian).
 - b. Cuntaka antuk ngeraja sewala.
 - c. Cuntaka antuk ngembasang putra.
 - d. Cuntaka antuk keruron (brunaha).
 - e. Cauntaka antuk pawiwahan.
 - f. Cuntaka antuk gamya gamana.
 - g. Cuntaka antuk salah timpal.
- (2) Sengker cuntaka manut kewentenannya:
 - a. Cuntaka kelayu sekar: cuntakania solas raina, ngawit saking mendem.
 - b. Cuntaka ngeraja sewala, sesampun mekeramas.
 - c. Cuntaka ngembasang putra, tigang sasih ane istri, akepus odel sane lanang.
 - d. Cuntaka keruron, cuntaka a bulan pitung raina tur sampun maprayastista.
 - e. Cuntaka pawiwahan, cuntakania ngnatos mawidi-widana.
 - f. Cuntaka gamya gamana, cuntakania ngantos kepalasang tur sampun kawentenang pamarayascita raga, rauhing pamarayascita desa adat, tur prabea nyane kamedalang olih sang melaksana asapunika.
 - g. Cuntaka salah timpal, risampun meprayascita manut dresta.
- (3) Sang nyambut karya pitra yadnya cuntakania, ngawit saking ngewangun karya (naceb) rauh riwusan yadnyania (mepegat).

Palet 4
Indik Manusa Yadnya

Pawos 42

- (1) Manusa yadnya inggih punika:
- (1) Upacara – upacara darmaning manusa saking patemoning kama bang miwah kama petak sajeroning garba, nyantos kelayu sekar (padem).
- (2) Upakara ring ajeng madudonan sekadi:
 - a. Magedong-gedongan/pengerimpian ibiang.
 - b. Wau rarene embas.
 - c. Kepus odel.
 - d. Roras raina.
 - e. Tutug kambuan (42 raine).
 - f. Tigang sasih.
 - g. Pawetuan (6 sasih).
 - h. Ngempugin (tumbuh gigi)
 - i. Tanggal gigi (maketus).
 - j. Matepung karna / ninggah munyi.

- k. Tutug kelih, ngeraja sewala sane wadon, ngembak-ngembak sane lanang.
 - l. Metetatah / mepandes.
 - m. Mawiwaha.
 - n. Mawinten.
- (3) Upacara-upacara inucap, nista madya utama manut sastra agama lan drestha.

Palet 5
Indik Butha Yadnya

Pawos 43

- (1) Butha yadnya inggih punika: upacara-upacara pabyakala ring pertiwi lan kahyangan, sarwa prnai saha upacara-upacara ring bebutan.
- (2) Upacara pabyakala ring sarwa prani luire:
 - a. Ring sarwa tumuwuh rikala tumpek pengantag.
 - b. Ring sarwa ingon-ingon rikala tumpek kandang/uye.
 - c. Upacara pakala-kala manusa anut wiguna kebawos kebyakala
- (3) Upacara pabyakala ring pertiwi, kahyangan, lan bebutan kewastanin “mecaru”.
- (4) Pecaruan inucap ring ajeng nista, madya, utama ,anut wiguna lan dresta kadi ring sor.
 - a. Ekasata.
 - b. Panca sata.
 - c. Rsi gana.
 - d. Panca sanak.
 - e. Panca kelud.
 - f. Tawur agung.
- (5) Sejawining kadi ring ajeng kawentenang upakara upacara:
 - a. Mejot-jotan utawi yadnya sesa nyabran usan ngerateng.
 - b. Mesapuh-sapuh rikala pacang wali ring pura.

Pawos 44

- (1) Nangken kewarsa rikala tilem kesanga kewentenang tahur kesanga manut drestha, tur risampune sandi kala kelanturang antuk ngerupuk, makecihna pacang mapag raia penyepian bejangne.
- (2) Brata penyepian sane kemargiang antuk krama desa:
 - a. Amati geni, tan kengin mapi – mapi.
 - b. Amati karya, tan kengin nyambut karya.
 - c. Amati lelanguan, tang kengin maoneng-onengan, masoara gora lan sepenunggilannya.
 - d. Amati lelungan, tan kengin meleluasan patut meneng ring jero soang-soang.
- (3) Pebratan inucap kemargiang saking semeng ngantos bejangne semeng endag surya, raris kasuarayang kulkul pinaka cihna pengembak geni.
- (4) Sang mamurug kecaping ajeng keni pamidanda manut perarem, sane kemargiang antuk patelik/pecalang desa.
- (5) Riusan raina nyepi mekecihna ngembak geni sowing-sowang krama desa sami ngaksama melarapan antuk dharma santi.

SARGA V
SUKERTA TATA PAWONGAN

Palet 1

Indik Pawiwahan

Pawos 45

- (1) Pawiwahan inggih punika patemoning purusa predana melarapan panunggalan kayun suka cita kadulurin upasaksi sekala niskala.
- (2) Pemargine pawiwahan luire.
 - a. Memadik kamenggala antuk pakraman.
 - b. Ngerorod, merangkat riin wau pekurnayang.
- (3) Pidabdab sang pacang mawiwaha patut:
 - a. Sampun menggeh dee-truna (persida nganutin undang-undang).
 - b. Sangkaning pad arena (tan gamya gamana) lan senunggal ipun.
 - c. Kesudi wadani prade pengambile tios agama miwah kepatiwangi prade ngambil triwangsa.
- (4) Pemargin pawiwahan mangda taler nganutin pemargin undang-undang perkawinan no. 1 tahun 1974.

Pawos 46

- (1) Pawiwahan sane kepatutng ring desa sekadi ring sor:
 - a. Sampun kemargiang pabiakala saha widi widana kesinaksiang sekala niskala antuk sulinggih utawi pinandita.
 - b. Wenten pesaksi prajuru utawi kelian desa, sane mapekelingan utawi ngilikitayang pawiwahan.
 - c. Sampun metengeran suara kulkul.
- (2) Perabian sane tan anut sekadi ring ajeng sinanggeh tan patut (tan sah).

Pawos 47

Tata caraning perabian patut sekadi ring sor:

- (1) Sapasira ugi pacang ngewarngin pakulawarga patut mesadok ring kelian desa maritatas manut tan manut perabiane.
- (2) Pemargine pepadikane anut dudonan:
 - a. Pakurnan jantos pang tiga:
 - Canag pengeraos lan seruntutan ipun.
 - Kaping kalih antuk bantal alem, kebaos pamuput kepadikan.
 - Risampun pragat raris sang istri ke iring budal ring pakubon sang lanang saha kelanturang antuk pabiakala miwah widi widana.
 - b. Mangda puput putus ring sekala niskala raris kulawarga purusa makta pejati ring merajan wadone tur keranjingang (kasukang) ring merajan lanange.
- (4) Prade ngerorod utawi merangkat:
 - a. Saking purusa patut ngawentenang pejati antuk duta sakirangnya kalih diri tur makta cihna lobakan.
 - b. Pegenahan antene tan kengin ring pakubon sang lanang sedereng mabiakala.
 - c. Sajeroning pakrunan patut:
 - Kamenggala antuk geng sinampura marep ring kulawarga pradana.
 - Kigumang bawos idih pakidih utawi palemngan arep ring pasewakan sang ngidih saha dewasa pekerab kambeane wekas.

- Kecihnayang indik ke purusa utawi prade sentana rajeg kajejerang kepatut ngidih anak lanang sane kebaos pawiwahan nyeburin tur risampun sulur pemerasan ketegepin kemanggehang sentana nyeburin.
 - d. Prade pejatine tan keterima jantos ping tiga pekurenan kemargiang sekadi patut.
- (5) Pakerab kambean mapiteges pupating upakara mapikurnan, duaning manut kadi ring sor:
- a. Sajeroning ambe, kelaksanayang niskala antuk mejauman miwah pewidi widana.
 - Jejauman pinaka ngadungang kayun sowing-sowang pakula wargan wadone.
 - Widi widana pinaka pejati niskala, nunas wadone ring pamerajan kemulan.
 - b. Sajeroning mawos kerab:
 - Antuk penyaksi krama desa duaning kekerabian antuk tetengeran kulkul.
 - Pamekas penyaksi kelian desa saha ngilikitayang.

Palet 2
Indik Nyapian
Pawos 48

- (1) Pawiwahan presida kausanang melarapan antuk palas perabian utawi kepademan.
- (2) Usan mapikurenan riantukan salah sinunggil seda mapiteges balu, mekadi balu lanang wiadin istri.
- (3) Palas perabian wantah kalih pawos, inggih punika sangkaning pada lila miwah mawiwit wicara (muyutan).
- (4) Sang ayat palas merabian patut atur upeksa ring kelian desa tur muputang saluir swadarmane ring desa, tur sampune polih pailikita ring sang rumawos (Pengadilan Negeri) wastu tingglas apadang pamutuse kebaos nyapian wau kelian desa nyiarang kewentennannya ring desa.
- (5) Sang ngaku palas merabian sedurung nyerahang ilikita saking pengadilan manggeh keni swadarmaning krama desa.

Pawos 49

- (1) Tata cara palas merabian sekadi ring sor:
 - a. Nuur prabea pesaksi sinalih tunggil sami metengeha.
 - b. Paguna kaya polih pahan pada.
 - c. Pebekel tadtadan sowing-sowang kekuasa niri-niri muah warisan kekuasa antuk purusa.
 - d. Ngaweruhin miwah ngupajiwa preti sentana manut swadarmaning purusa.
 - e. Naur pamidanda, penumbras kulkul manut perarem.

Pawos 50

- (1) Prade riwekas sang palas kacihnann adung malih patut:
 - a. Ngelaksanayang pawiwahan malih.
 - b. Kedanda nikel saking palase, yadiastun wit palase pecak sangkaning pada lila.

Pawos 51

- (1) Sang balu kabinayang dados tatiga:
 - a. Balu luh wit sentana (wit sentana rajeg) miwah balu luh boya sentana.
 - b. Balu muani kepurusan (wit sentana) miwah balu muani nyeburin (baya sentana).
 - c. Balu luh sane sampun muali ked aha.
- (2) Swadarmaning balu inucap patut:
 - a. Ngemanggehang pati brata sane istri satyaning rabi sane lanang tan kengin ngemargiang paradara drati krama.
 - b. Sang balu istri patut muponin paguna kaya tan dados ngadol, ngadeang, makidiang lan seosan punika sejawining polih uwak-uwakan saking pianak utawi kulawarga pinih tampek saking kurnannya prade pianaknya kantong alit.
 - c. Kengin ngidih sentana prade wenten pidabdab sedurung sinalih tunggil padem, saha polih uwak-uwakan antuk keluarga sinanggeh ke purusa.
 - d. Prade sang balu istri mawiwaha malih swadarmane kadi aksara (b) ring ajeng ical.

Pawos 52

- (1) Balu kaucap tan pageh ring ajeng:
 - a. Drati krama utawi paradara.
 - b. Matilar saking pakubon tan pesadok jantos enem sasih.
 - c. Lepas ring swadarma sewos-sewosan, tan presida ngehehin solah maprewerti arep ring pituduh kulawarga purusa.

Pale 3 Indik Sentana

Pawos 53

- (1) Sentana wenten kalih pawos, sane kaucap prati sentana, miwah sentana peperasan.
- (2) Prati sentana inggih punika, sentana sane metu saking pawiwahan kepatut.
- (3) Prade pawiwahane ten kepatut ngewetuang sentana, mangda tan kantong kewastanin bebinjat utawi astra yohya ka menggala antuk penyangaskara.
- (4) Prade pawiwahane tan ngawetuang sentana, kengin ngidih sentana antuk upasaki niskala sane kewastanin sentana peperasan.
- (5) Sentana peperasan patut polih pengingkup bawos (persetujuan) kulawarga purusa utawi tunggalan dadia.
- (6) Sentana rajeg inggih punika: prati sentana wadon (predana) sane ngemanggehang lanang (purusa), sesampune upacara putrika, tur risampune ngelaksanayang pawiwahan nyeburin (kidiang anak muani).
- (7) Sang sane dados kearsayang sentana rajeg inucap wiwit (6) inggih punika.
 - a. Prati sentana sinalih tunggil.
 - b. Sampun kemanggehang dados preti sentana lanang (purusa).
 - c. Pawiwahan kacenurin, kautamayang antuk jadmata sane megama hindu, utawi jadmata sane megama siosan, sane sampun ngelaksanayang pamarisudha raga utawi sudi wadani.
 - d. Sane kemanggehang sentana rajeg, patut mesadok ring kelian desa, tur I kelian patut nyiarang ring desa saha ngaturang ring prajuru desa adat.

Pawos 54

- (1) Ngangkat sentana manut dudonan patut makecihna arta brana kesinaksiang sekala niskala.
- (2) Sape sira ugi krama pacang ngidih sentana patut mesadok ring kelian desa sanistane a sasih sedereng pemerasan.
- (3) Kelian desa nyiarang ring wewidangan desa, sang sapa sira ugi rumasa tan lila mangda nyadokang mesengker kalih wuku sebanen pemerasan ring kelian adat.
- (4) Prajuru desa digelis mawesin saha ngicenin pamutus nepek ring dresta.
- (5) Prade wenten sane mialangin prajuru patut nuntun mangda muputang sulur bebawos riyin.

Pawos 55

- (1) Peperasan sane patut ring desa risampun makecihna:
 - a. Widi widana pemerasan.
 - b. Kesaksinin antuk prajuru desa sane mekelingang utawi ngilikitayang tur polih ilikita saking pengadilan negeri.
 - c. Kakesyarang ring wewidangan desane.
- (2) Sane kepatut peras anggen sentana kadi ring sor:
 - a. Jadma megama hindu.
 - b. Peperahan nedunang saking sang meras.
 - c. Kulawarga saking purusa, prade tan wenten kengin saking wadon, yening taler tan wenten wau kengin sekama-kama (saking kayun) nanging sesamen.
 - d. Kautamayang saking waris pacer kapurusa.
 - e. Sinalih tunggil mawiwit saking kulawarga tunggal sanggah utawi merajan, paibon lan dadia utawi ngambil anak tios sakewanten sane megame hindu.
- (3) Kengin ngangkat sentana langkung ring adiri, lanang wiadin wadon.

Palet 4 Indik Warisan

Pawos 56

- (1) Warisan inggih punika tetamian arta brana saha ayah-ayahan ngupadi sukerta sekala niskala saking keluhurannia arep ring turunannya.
- (2) Sang sinanggeh warisan luire:
 - a. Due tengah mekadi tegal ayahan desa, kahyangan, pusaka, siwa krama.
 - b. Pemerajan kemulan.
 - c. Pegunakaya, tadtadan / jiwa dana, utang piutang.
- (3) Wawu kengin bebawos warisan prade wenten:
 - a. Sang mapiturun (pewaris).
 - b. Keturunan (ahli wairs).
 - c. Arta brana miwah tetegenan (ayah-ayahan) makecihna warisan.

Pawos 57

- (1) Ahli waris luire:
 - a. Prati sentana purusa.
 - b. Sentana peperasan lanang.

- (2) Prade tan wenten sekadi ring ajeng, sang sinanggeh ahli waris:
- a. Turunan purusa pernah ngunggahang, krama lanang, pokok selantur ipun rerama, misan, mindon.
 - b. Turunan purusa pernah kesamping mekadi ponakan miwah mindon.
- Pawos 58
- (1) Swadarmaning ahli waris:
- a. Nerima saha ngewasayang tetamian pahan saking keluhurannia, mekadi ngerempon sanggah, Pura saha pangupakarnia, mwah nyelidihinin ayah-ayahan pewaris.
 - b. Ngabenang pewaris saha ngelanturang upakara-upakara pitra.
 - c. Nawurin utang-utang pewaris sane manut pengelokita
- Pawos 59
- (1) Pangepahan warisan manut sekadi ring sor:
- a. Risampun kelaksanayang pitra yadnya lan hutang – hutang pewaris buntar ketawur.
 - b. Para ahli waris polih pahan pada sangkaning paguna kaya.
 - c. Sinalih tunggil ahli waris kengin tan polih pahan prade:
 - Nilar kawitan lan sesananing agama.
 - Alpaka guru rupaka sesampun wenten bisama.
 - Sentana rajeg kesah mawiwaha utawi prati sentana nyeburin, sowang-sowang ke bawos ninggal ke daton.
- (2) Boya ahli waris kengin mupnin hasil anut dudonan luire: sentana luh, salami dereng kesah mawiwaha.
- (3) Pewaris kengin meweweh rikala maurip pinaka jiwa dana, tadtadan/bekel, makacihna paweweh tetep ring pianake sane kesah mawiwaha.
- Pawos 60
- (1) Prade sejeroning pakulawargan wenten ahli waris langkungan ring adiri patut:
- a. Kawentenang paigum indik pedum waris inucap.
 - b. Yen ten wenten presida ketunasang tetimbangan ring dulu-dulu (kerta desa).
 - c. Prade taler ten wenten cumpu ring penetas kerta desa, kengin ketunasang ring sang rumawos (Pengadilan Negeri).
- (2) Prade karang inucap keputungan, patut kadrue olih desa.

SARGA VI
WICARA LAN PAMIDANDA
Palet 1
Indik Wicara
 Pawos 61

- (1) Sang wenang mawosin mekadi mutusing wicara ring desa inggih punika prajuru desa sinanggeh kerta desa.
- (2) Prade sang mawicara tan wenten cumpu ring pemutus kerta desa, kengin nunasang wicara inucap ring sang rumawos (Pengadilan Negeri).
- Pawos 62
- (1) Sahanan wicara mawiwit kecorahan saha luire sinanggeh nungkasin daging awig-awig pasuara miwah perarem desa/banjar, prajuru patut digelis mawosin tan nyantos pesadok.

- (2) Sejaba wicara kadi ajeng patut nyantosang pesadok sang nunas bawos.
- (3) Panepase patut pastika nyantenang iwang patut melarapan tri premana (saksi ilikita, bukti) miwah tan maren nepek ring catur drestha.
- (4) Sinalih tunggil wenten krama desa sane mekarya biuta wenang kekeninin sanki manut uger-uger desa adat tukad belah, minekadi (a) ngelaksanang prayascita ring pura kayangan tiga, (b) naur beras ring krama desa akeh nyane apikul (100 kg).
- (5) Sinalih tunggil wenten krama duradesa sane mekarya biuta ring desa Adat Tukad Belah kekeninin sanksi minekadi (a) ngelaksanang prayascita ring pura kayangan tiga, (b) naur beras ring krama desa akeh nyane apikul (100 kg).
- (6) Sinalih tunggil wenten krama desa lan duradesa sane mekarya biuta nyantos ngemedalang rah kekeninin sanksi minekadi (a) mecaru rsigana ring wewidangan desa adat tukad belah tur ngemargiang nunas ampura ring krama desa Adat Tukad Belah.

Palet 2
Indik Pamidanda
Pawos 63

- (1) Kelian desa wenang niwakang pamidanda ring krama desa sane sisip.
- (2) Peniwak inucap kelaksanayang manut tri premana.
- (3) Bacakan pamidanda luire:
 - a. Ayahan panukun kesisipan.
 - b. Denda arta (desa, danda saha panikel-nikelnya miwah nikel urunan).
 - c. Rerampagan.
 - d. Kesepekang.
 - e. Penyakaskara.
- (4) Jinah utawi raja brana pamidanda ngeranjing dados drue desa.

Pawos 64

- (1) Krama sane langkung ring tigang paruman ngelantur tan nawur urunan miwah dedandan wenang kerampag, utawi kelelang.
- (2) Rerampagan ngangge tata cara sekadi ring sor:
 - a. Kelaksanayang antuk prajuru kesarengin antuk sekane tigang diri maka saksi.
 - b. Sang ngerampag sangkaning darsana ngambil barang utawi nyawenin tanem tuwuh, akehnya manut ring utang sang kerampag.
 - c. Prajuru miteketang mangda barang-barang sane kerampag digelis ketebus, masenger suku ring kutus rahina pacang ke adol.
 - d. Tan ngeninin saluir barang sane patut inggilang manut agama miwah mademang pangupa jiwa sang kerampag.

Pawos 65

- (1) Prade sang pacang kerampag ngewara (mialangin) paridabdab inucap mewastu sampun tan nganutin awig-awig desa wenang kesepekang (hukuman bathin).
- (2) Pamidanda inucap adeng keni buntas risampun sang kekeninin:

- a. Nunas geng sinampura ring krama riantukan nguak pasubaya (kerarem) pecak.
- b. Nawur pengargan panguak pasubayan kadulurin pepayascita penyapsap keiwangan ring desa.

**SARGA VII
NGUWAH-NGUWEHIN AWIG-AWIG**

Pawos 66

- (1) Nguwah-nguwehin awig-awig desa punika kemargiang antuk paruman desa.
- (2) Paruman inucap mangda kseungkemin antuk pekarsan krama desa.
- (3) Pidaging nguwah-nguwehin melarapan antuk segilik-seguluk, selung sebayantaka.

**SARGA VIII
P A M U P U T**

Pawos 67

- (1) Sakeluwiring sane wenten sederengnia patut keanutang ring sedaging awig-awig puniki.
- (2) Sakeluiring sane durung kebaos sajeroning awig-awig puniki, patut kelaksanayang manut tatacara sane sampun ketah memargi, kadulurin antuk perarem-perarem.

Pawos 68

- (1) Awig-awig puniki kararemin duk : wuku
- (2) Awig-awig puniki kemargiang ngawit kararemin /kaingkupin.
- (3) Awig-awig puniki kalingga tanganin antuk:

Bendesa Adat Tukad Belah

Penyarikan

I Made Gunaksa

I Wayan Gede Darmayasa